

Date – 05/07/2026

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. CEO Pi Garima Gupta-in Mizoram hmun thenkhata vote nei zat percentage pung hluai a awm nia sawi chu thil fel lo a awm lo tih a sawi.
2. Lirthei hmanga eizawng pawl pathum intelkhawm chuan tun hnaia hman thar, Mizotaxi Application chu High Court-ah khin an tum.
3. Minister hlui Pu F. Malsawma (78) chu vawiin chawhnu dar 2 leh a chanve khan Chaltlang Presbyterian Kohhran Centenary Hall-ah vuiliam a ni.
4. Union Rural Development Minister, Shivraj Singh Chouhan-a'n VB-G RAM G hnuaiia tanpuina sum thawh khatna, cheng vbch 25,000 chuang a pe chhuak.

<><><>

NO NORMAL INCREASE IN VOTERS

Chief Electoral Officer (CEO) Pi Garima Gupta chuan Mizoram hmun thenkhatah vote nei zat percentage pung hluai a awm nia sawi chu Special Intensive Revision (SIR) tih zawh taka an data atangin thil fel lo a awm lo tih a sawi.

Nimina I&PR Conference Hall, Aizawla thuthar thehdarhtute a kawmnaah Pi Garima Gupta chuan tunhnaia Mizo Zirlai Pawl (MZP)-in Mizoram chhim lama Chakma tamna khuaah te kum 2005 leh kumin 2026 electoral roll khaikhinin vote zaa 121 zetina pung nia an sawi chungchang chanchinbumite zawhna chhangin, Special Intensive Revision (SIR) tih zawh taka an data atangin vote nei pung hluai a awm lo a ti a. Hei bakah hian MZP-in ramdangmi, foreigner te SIR a thun an hlauhthawn thu leh electoral roll ennawn tha leh tura ngenna an thehluk chungchanga zawhna pawh chhangin, MZP ngenna thehluk chu DEO te an bawhzui tir a, SIR 2026-ah hian ramdangmi ziahluh an awm lo a ti a. SIR kalpuinaah hian sorkar official te bakah political party aiawhte an tel ve bawh tih sawiin, dik leh fel taka kalpui a nih thu a sawi a ni.

Election Commission of India thupek angin Special Intensive Revision 2026 hi kumin May ni 20 atang khan Mizoram pumpuiah kalpui tan niin, June ni 28 khan zawh fel a ni a. Mizoram puma vote nei mi nuai 8, 28,906 zinga mi sing 1, sang 6, 360 te chu vote nei thar kum 18 atanga kum 19 inkar te an ni a, vote nei zingah kum 80 chin chunglam mi 9,637 an awm bawk a ni.



12 YEARS OF NDA

Sorkar laipuiin hmeichhe naupang kum 10 hnuailam tana sum khawlina tur scheme a siam, Sukanya Samridhi Yojana (SSY) chu Mizoramah Project Thaichhawninu tih vuahin kalpui mek a ni.

Akashvani Aizawl-in a kawmnaah, BJP Mizoram IT & Media Cell, Prabhari, Pi K.Vanlalruati chuan SSY scheme hnuaiiah hian hmeichhe naupang a lo pianin, a nu leh pate chuan cheng 250 in bank account pakhat an hawn sak tan thei a ti a, kum 10 an nih thleng an bank account-ah pawisa an dah thei a. Hmeichhe naupangte chu an lo puitlin huna, pawl 12 an zir zawh hunah zirna sang zawk an zir dawnin an account hmangin sorkarah dilna an thehlut ang a, sorkar laipui in an zirna turah a pui dawn a ni a ti a. Pi K.Vanlalruati chuan Prime Minister Pu Modi-a kaihhruai sorkarin kum 12 a tlin lawmna pualin SSY hi hawn thar ani a ti a, Mizoram sorkar chuan Mizo hming mawi deuh phuahin Project Thaichhawninu tiin Mizorama hman turin an kalpui tih a sawi a. Tunhma pawhin hmeichhiaten pasal an neih huna an hman theih turin sorkar laipui chuan hmeichhe naupangte tan bank account hawn theihna a lo siam tawh thin a, state thenawm leh ram chhung state thenkhatte chuan hmeichhe naupang hamthatna tura sorkar laipuiin scheme a siamte chu an kalpui tha hle a, Mizoramah erawh chuan hmeichhe naupang invulhna hi an uar lo hle ni-a an hriat thu a sawi bawk a ni.

BJP Mizoram State Media Convener, Pu Johny Lalthanpuia chuan ram mipuite hamthatna tura siam PM scheme hrang hrangte chu a hmang tangkaitu tur Mizo mipuite'n an hre tawh lo hle nia a hriat thu a sawi a. Mizoramah mirethei tak tak an tam avangin PM scheme hrang hrang te chhawr tangkaitu mipui an lo tam zawk theih nan Mizoram sorkar chu theihtawpa tan la turin a ngen a. PM Scheme hrang hrang hrechiang duh leh puih ngai te chu BJP Mizoram pisa, Upper Republic, Aizawlah engtiklai pawhin an pui thei reng tih a sawi a ni.

MIZOTAXI APP

Lirthei hmanga eizawng pawl pathum- Mizoram Taxi Association (MTA), Aizawl Two Wheeler Taxi Association (ATTA) leh Aizawl District Auto Rickshaw Owners' Association (ADAROA) intelkhawm chuan tun hnaia hman thar, Mizotaxi Application chu High Court-ah khin an tum.

MTA, ATTA leh ADAROA office bearer te hi nimin Inrinni khan thukhawmin Mizotaxi Application chu High Court-a kalpui turin thutlukna an siam a. Hemi chungchanga Akashvani Aizawl News zawhna chhangin, ATTA President Pu

Lalhmunmawia chuan Mizo Taxi application an hman duh loh chhan hrang hrang zingah rate ennawn hmasak an duh thu te, registration fee awm lo se tih te leh app hmangtu mipuiten chhiah za a 6 an chawi tur te a tel tih sawiin, sorkar hnenah pawh an thlen tawh a ti a. He app chungchang hi an zirchian hnuah Motor vehicle rules bawhchiatna engemawzat a awm ni a an hriat bawk avangin a rang thei ang bera High Court kalpui turin thutlukna an siam tih a sawi.

Lirthei hmanga eizawng pawl pathumte dodalna hnuaiiah MizoTaxi online application hi Nilaini khan Transport Minister Pu Vanlalhlana'n tlangzarhin hman tan nghal a ni a, tlangzarh hma ni June ni 30 thleng khan lirthei 974 inziak lut an awm tawh a, chung zingah chuan 4-Wheeler Taxi 275, Auto Rickshaw 17 leh 2 Wheeler taxi 683 an tel a, MizoTaxi online application hmang tur hian Cheng 500-chawi a inziah luh a ngai a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



F. MALSAWMA LAID TO REST

Minister hlui Pu F. Malsawma (78) chu vawiin chawhnu dar 2 leh a chanve khan Chaltlang Presbyterian Kohhran Centenary Hall-ah vuiliam a ni.

Thin cancer avanga nizan dar 7 leh a chanve a Trinity Hospital a thi, Pu F. Malsawma hi Chaltlang Presbyterian bialtu Pastor P.B. Mankima'n a vui a. Uitu a ngahin vuina-a kal an thahnem hle. Pu F. Malsawma hian a nupui Pi Zoramthangi leh a fate 3 leh tu 9 a kalsan a ni. Zirna lamah Gauhati University atangin MA a zo a. Kum 1975 khan Brig. T. Sailo kaihhruai People's Conference (PC) zawmin kum 1978 Mizoram assembly inthlanah Suangpuilawm bial atangin PC ticket a thlan tlin a ni a, kum 30 leh thla 9 chauha upa niin Cabinet Minister atan lakluh a ni. Kum 1979 inthlanah a bial ngai atanga thlan tlin leh niin Cabinet Minister atan bawk lakluh leh a ni a. PC sorkarah hian Education te a chang a. Ministry term zawh hman remna leh muanna a awm theih na'n tiin Minister nihna a bansan a ni.

Kum 1993-ah MNF candidate in Aizawl North-2 bial atangin thlan tlin a ni a. Kum 1998-ah a bial ngai-ah thlan tlin nawn leh niin Cabinet Minister atan lakluh leh a ni a. School Education, Law & Judicial and Parliamentary Affairs, Health & Family Welfare, Tourism, Information & Public Relations te a chang a. Kum 2015 khan politics a chawlhsan ta a ni.



SS CHOUHAN RELEASES VB-G-RAM-G ASSISTANCE

Union Rural Development Minister, Shivraj Singh Chouhan-a'n VB-G RAM G hnuaiia state hrang hrangte tana tanpuina sum thawh khatna, cheng vbch 25,000 chuang, vawiin khan video conferencing atangin a pe chhuak a, State leh Union Territory zawng zawng Rural Development minister-te nen VB-G RAM-G kalpui anih dan a thlirlet pui bawk.

Pu Chouhan-a chuan July ni 1 atanga Viksit Bharat-Guarantee for Rozgar and Ajeevika Mission (Gramin), VB-G RAM G Act, 2025 hlawhtling taka kalpui tan a ni chu lawmawm a tih thu a sawi a, vawiina sum pek chhuah chu state tinin he scheme hnuaiia inhlawhfa-te hnena ni 15 chhunga an thawh hlawh an pek theihna tura ruahman a ni, a ti. Mahatma Gandhi National Rural Employment Guarantee Scheme chu VB-G RAM G Act hian hlawhtling takin a din thar tih sawiin he Dan hnuaiiah hian kum 5 chhungin Panchayat nuai 2 sing 8 sang 6-tan cheng vbch nuai 7 sing 5 ruahman tum a ni, a ti a, he scheme hnuaiiah hian hlawhfa rate pawh chawh rualin zaa 10 vela tih san a nih thu sawiin ni khatah cheng 300 aia tlem hlawh, khawi state-ah mah an awm tawh dawnlo a ni, a ti bawk.

<><><>